



KUVENDI I SHQIPËRISË
Komisioni për Politikën e Jashtme

Dokument parlamentar

RAPORT
PËR PROJEKTLIGJIN

“PËR RATIFIKIMIN E MARRËVESHJES SË HUAS, NDËRMJET REPUBLIKËS SË SHQIPËRISË, PËRFAQËSUAR NGA MINISTRIA E FINANCIVE DHE EKONOMISË, (HUAMARRËSI), FONDIT SHQIPTAR TË ZHVILLIMIT (AGJENCIA E ZBATIMIT TË PROJEKTIT), DHE KFË FRANKFURT AM MAIN (KfW), PËR PROGRAMIN E FURNIZIMIT ME UJË TË ZONAVE RURALE IV”

I. HYRJE

Komisioni për Politikën e Jashtme, në cilësinë e Komisionit për dhënie mendimi, në zbatim të neneve 32-38 të Rregullores së Kuvendit, shqyrtoi projektligjin “Për ratifikimin e marrëveshjes së huas ndërmjet Republikës së Shqipërisë, përfaqësuar nga Ministria e Financave dhe Ekonomisë, (Huamarrësi), Fondit Shqiptar të Zhvillimit (Agjencia e Zbatimit të projektit) dhe KfW Frankfurt am Main (KfW), për programin e furnizimit me ujë të zonave rurale IV”.

Projektligji i paraqitur për shqyrtim është propozuar nga Këshilli i Ministrave, sipas përcaktimeve të neneve 78, 83, pika 1, dhe 121, pika 1 të Kushtetutës së Republikës së Shqipërisë dhe shoqërohet me relacionin përkatës sipas nenit 68 të Rregullores së Kuvendit.

Të pranishëm në mbledhjen e Komisionit për të prezantuar projektligjin dhe për t’u dhënë shpjegime pyetjeve të deputetëve ishin përfaqësues të Ministrisë së Financave dhe Ekonomisë dhe Fondit Shqiptar të Zhvillimit.

II. QËLLIMI DHE PERMBAJTJA E PROJEKTLIGJIT

Qëllimi i projektligjit është ratifikimi i marrëveshjes së huas, të lidhur ndërmjet Republikës së Shqipërisë, përfaqësuar nga Ministria e Financave dhe Ekonomisë, në cilësinë e huamarrësit, Fondit Shqiptar të Zhvillimit, në cilësinë e agjencisë së zbatimit të projektit, dhe KfW Frankfurt Am Main, për financimin e programit të furnizimit me ujë të zonave rurale IV.

Kjo marrëveshje huaje ka për qëllim financimin e fazës së katërt të programit të furnizimit me ujë të zonave rurale, nëpërmjet akordimit nga KfW-ja të një huaje në shumën 40 000 000 (dyzet milionë) euro. Këto fonde huaje do të përdoren ekskluzivisht për rehabilitimin dhe shtrirjen e sistemeve të furnizimit me ujë, kanalizimeve dhe sistemeve të trajtimit të ujërave të ndotura, si dhe për shërbimet e konsulencës në lidhje me zbatimin e projektit në zonën bregdetare të jugut të Shqipërisë.

Ky program mbështetet në Strategjinë Kombëtare për Furnizimin me Ujë dhe Kanalizimet dhe Strategjinë Kombëtare për Zhvillim dhe Integrim 2015-2020 dhe vlerësohet se do të kenë impakt pozitiv për popullsinë rezidente dhe turistët e shumtë në këtë zonë, duke e çuar kështu numrin e përfituesve në 80 000, përfshirë turistët.

Huaja që do të akordohet nga KfW-ja nuk kalon vlerën 40 000 000 (dyzet milionë) eurosh dhe norma e interesit të huas do të përcaktohet nga KfW-ja, pas dy ditëve pune nga marrja e njoftimit se janë përmbushur kushtet e bërjes efektive të marrëveshjes së huas (kusht ky i diktuar nga KfW-ja, për shkak se kredia akoma nuk është efektive dhe nuk konsiderohet kredi e angazhuar për vendin tonë dhe si e tillë nuk ka një bazë ligjore për KfW-në për të përcaktuar normën e interesit).

Në vlerësimin e efekteve financiare, projekti “Furnizimi me ujë i zonave rurale IV” vlerësohet të jetë 45.15 milionë euro (pa përfshirë këtu vlerën e TVSH-së apo taksa të tjera që lindin nga projekti që do të mbulohen nga buxheti i FSHZ-së) dhe kjo do të financohet nga:

- huaja në fjalë në vlerën prej 40 milionë euro;
- buxheti i shtetit në vlerën 1.35 milionë euro;
- granti që do të akordohet nga KfW-ja në vlerën 2 milionë euro;
- granti që do të akordohet nga WBIF-ja në vlerën 1.8 milionë euro.

Projekti është parashikuar në programin buxhetor afatmesëm 2019-2021 të Fondit Shqiptar të Zhvillimit, më konkretisht në programin “Furnizimi me ujë i zonave rurale IV”.

III. DISKUTIMI NË KOMISION

Të pranishëm në mbledhjen e Komisionit, për të shpjeguar nismën dhe për t'iu përgjigjur pyetjeve të deputetëve, ishin përfaqësues të përfaqësues të Ministrisë së Financës dhe Ekonomisë. Deputetët në komision u informuan rreth qëllimit të projektligjit dhe kushteve të parashikuara në marrëveshje. Përfaqësuesit e ministrisë sqaruan se kjo marrëveshje ka për qëllim financimin e fazës së katërt të programit të furnizimit me ujë të zonave rurale, nëpërmjet akordimit nga KfW-ja të një huaje në shumën 40 000 000 (dyzet milionë) euro, fonde huaje të cilat do të përdoren ekskluzivisht për rehabilitimin dhe shtrirjen e sistemeve të furnizimit me ujë, kanalizimeve dhe sistemeve të trajtimit të ujërave të ndotura, si dhe për shërbimet e konsulencës në lidhje me zbatimin e projektit në zonën bregdetare të jugut të Shqipërisë.

Deputetët pasi u informuan për kushtet specifike të marrëveshjes vlerësuan bashkëpunimin me KfW-në dhe ndikimin që pritet të ketë ky fond në përmirësimin e infrastrukturës së ujësjellësve dhe kanalizimeve, nëpërmjet sigurimit të qëndrueshëm në furnizimin me ujë të pijshëm për popullsinë rezidente dhe turistët në zonën e projektit.

Në përfundim të diskutimeve, Komisioni me votat e shumicës së anëtarëve të pranishëm e miratoi projektligjin në parim, nen për nen dhe në tërësi dhe u shpreh dakord për kalimin e tij për votim në seancë plenare.

KRYETARE

MIMI KODHELI